

Ufficio Stampa della Provincia autonoma di Trento

Piazza Dante 15, 38122 Trento

Tel. 0461 494614 - Fax 0461 494615

uff.stampa@provincia.tn.it

COMUNICATO n. 1972 del 02/07/2026

La desposizion la é vavevola per i nascimenc e per la adozions dal 1m de jené del 2026

Assegn de natalità per l terz fi, coi 15 de messèl se pel fèr domana

[Ladino] Coi 15 de messèl se podarà fèr domana per l assegn de natalità metù en esser da la Provinzia autonoma de Trent per la families te cheles che nasc o vegn adotà n terz fi. Chesta desposizion, sessaben, la perveit na quota fissa paèda fora te diesc egn, aldò de la situazion economica de la familia e na quota premie, per engaissèr la mères a jir endò e restèr a lurèr.

“Favorir la natalità vel dir creer tel davegnir del Trentin, te la families e te la stabilità sozièla de noscia comunazes. “Con chesta desposizion la Provinzia desmostra de voler compagnèr a na vida concreta chi che cern de aer fies, col sporjer n didament economich segur e stabol tel temp”, disc l president Maurizio Fugatti.

“L assegn per l terz fi – disc l vizepresident e assessor per l Svilup economich, lurier, familia, università e enrescida Achille Spinelli – met adum didament economich e valorisazion del lurier de la femenes. Dessema con chest didament, che l vegn garanti per diesc egn alalongia, vegn pervedù estra apede n didament specifich per la mères che va endò o resta a lurèr, spervaji che natalità, lurier e bonstèr de la familia i cogne crescer ensema. Coi mudamenc neves aproé da la jonta, la prozedures les é più scempies: vegn smaorà i terminis per portèr dant la domanes e dat l met de les fèr online”.

Chi che pel fèr domana

L assegn l é rresservà a la families che stèsc te la provinzia de Trent te cheles che nasc o vegn adotà n terz fi. La mère cogn aer i requisic de zitadinanza e residenza pervedui da la normativa provinzièla e la cogn fèr pèrt nel medemo nucleo anagrafich di fies.

Anter i requisic vegn pervedù enche che la mère l’abie n lurier canche la compra o tel moment de l’adozion, opuramenter che l’abie paà ite contribuc previdenzièi per amancol 12 meis, enche no a do a do, ti ultimes cinch egn.

La desposizion la é vavevola dant de sia publicazion, per i nascimenc e la adozions dal 1m de jené del 2026.

Quota fissa e quota premie

La suma la muda conforma la situazion economica de la familia calcolèda aldò del ICEF Familia:

enscin 48.000 euro en dut (400 euro al meis) per families con ICEF fin a 0,40;

enscin 30.000 euro en dut (250 euro al meis) per families con ICEF più aut che 0,40 e fin a 0,70;

per families con ICEF più aut che 0,70 o zenza ICEF la suma massimala perveduda la é semper de 30.000 euro, donca 250 euro al meis, da sotmeter al IRPEF.

L assegn l vegn dat fora a scomenzèr dal meis do del nasciment o de l’adozion scin canche l bez l compesc diesc egn.

Coi trei egn del bez vegn pervedù na quota premie de 200 euro al meis, per la mères che va endò o resta a lurèr, tout ite enche cheles che se met per sie cont. Per poder se emprevaler del didament ge vel desmostrèr de aer lurà amancol 180 dis (enche no do a do) via per l an dant da la domana.

Co portèr dant la domana

Do dai mudamenc aproé da la Jonta provinzièla con provediment dai 25 de mé, la domana, tant chela quota fissa che chela premie, la per esser portèda dant da la mère tras autenticazion con SPID o con Chèrta d'Identità Eletronica (CIE), opuramenter tras i ofizies de patronat che l'é sul teritorie provinzièl. L termin per portèr dant la domana l'é stat smaorà a 180 dis dal nasciment o da l'adozion del fi. Per chest an vèl la **desposizioni transitories per l 2026**: per i bec nasciui o adoté dant dai 30 de jugn del 2026 la domana per la quota fissa la pel vegnir fata dant dai 31 de dezember del 2026, e vegn paà fora duc i meisc passé.

Per de outra informazions vardèr fora la piata: [Assegno di natalità per il terzo figlio](#)

Traduzion di Servijes Linguistics e Culturèi del Comun general de Fascia

(cdt)